

EHIDÂS PYECCEE
KUVLÂN

Ehidäs vietidijn pyeccee kuvlân meiddei eres mieldiorroid adeluvvoo ehidäs, jis sij tom halijdeh.

Ehidäspiergâseh piäijojeh vielgis lijnijn lovdum peevdi oolâ. Peevdi oolâ puáhtá pieijâđ meiddei riistâ teikâ krusifiiksi já cokkiittiđ kinttâl.

Myenster rukosijd já teevstâid puáhtá kevttiđ meiddei ehidâsimmeelpalvâlus vietidijn pyecceiviäsust teikâ puárrásijviäsust.

I Laidiittâs

1. Algâsalmâ

2. Álgusivnádâs

Sivnádâs já vuárutiervättâs puáhtá lávlud teikâ luuhâđ.

Sivnádâs

P Eeji já + Alge já Pase Jiegâ noomân.

S Aamen, aamen, aamen.

Vuárutiervättâs

P Hiärrá liävus tiigijn.

S Nuuvt še liävus sun tuu-uv jieggáin.

3. Laidiittâssäänih

Laidiittâssaanijd puáhtá rähtiđ meiddei rijjáht.

P Hiärrám Jeesus Kristus lii ettâm: ”Kost kyevtis teikâ kuulmâs láá čokkânâm muu noomâst, tobbeen mun lam sii kooskâst.” (Matt. 18: 20) Mij lyettip tääl-uv suu mieldioromân. Sun äärmit mii, ko tubdâstep sudoidân. Sun lii oskolâš já vanhurskes. Sun addel suddoid addâgâs já putteest puoh verivuodâst. Moonâ ruokkâdâvt Hiärá oovdân, tuubdâst sudoidâd já ruhâdâl sust addâgâsadelem.

4. Rippâ

Sudotubdâstâs

Ripâttettee olmooš puáhtá tubdâstid sudoidis jieijâs sanijgijn. Puáhtá kevttid meiddei mottoom čuávuvvâš sudotubdâstâsain. Riipâ vuástávâldee puáhtá luuhâđ sudotubdâstâs ripâttettee ulmuin teikâ suu peeleeest.

1. Immeel, almalâš Iáččám.

Lam suddodâm tuu vuástá

jurduigijn já sanijgijn, tavoigijn já kuáridemijgijn.

Eromâšávt tubdâstâm, et lam --.

Tot tiáddá muu uámitobdo.

Tun uáináh meiddei taid suddoid, maid jieškin jiem tieđe.

Kaadâm puoh taam já ruhádâlâm:

liččih munjin ármugâs. Adde sudoidân addâgâs

râhis Algaad Jeesus Kristus tiet.

2. Hiárrá, tun lah láädis, mušte muu,

čääiti avalii pyerivuodâd.

Ele mušte sudoidân,

ele paas tavoidân!

Tun, kote lah oskolâš já pyeri,

ele vâjâldit muu!

3. Kienňâlvuodâst mun čuárvum tuu, Hiárrá.

Hiárrá, kuulâ muu jienâ.

Vákšojus tuu peeljih muu rukkoos.

Jis tun Hiárrá, anah mielâstâd suddoid,

Hiárrá, kii talle killáá?

Mut tust lii ármu, tun adelah addâgâs,

et mij iäláččijm tuu paaloost.

Tondiet, Immeel,

liččih munjin ármugâs pyerivuodâstâd.

Poosâ muu putesin rikkomušâstân

já adde jurrâmâšân addâgâs.
 Tuu vuástá lam rikkom,
 lam porgâm tuu táatu vuástá.
 Jurgâl kejâstuvâd meddâl muu suddoin
 já siho must puoh paas tavoidân.
 Immeel, sivned munjin putes vááimu
 já udâsmit muu, adde vievsâs jiegâ.

4. Ármugâs Immeel.

Tubdâstâm ovdâstâd,
 et suddo lii čoonnâm muu,
 jiemge pyevti pestid jieččân.
 Lam rikkom tuu pase táatu vuástá
 já tuástum pákkumijdâd sivnádâs.
 Tun uáináh puoh vere,
 tom–uv, maid jieš jiem uáni.
 Äärmit muu Algaad Jeesus Kristus tiet.

5. Oo tun puoh ármulumos,

riistännävlejum Hiärrá Jeesus Kristus.
 Äärmit muu, váiváás suddogâs,
 já keejâst muu piälán lädisvuodâd čolmijgijn,
 tego tun keččih Piätárân, ko sun lâi kiäldám tuu,
 já tego tun keččih suddogâs nisonân fariseus visteest
 já riävárân riistâmuorâst.
 Adde munjin pase áármud,
 et mun tego Piättár čiäruččim sudoidân,
 tego suddogâs nissoon tuu váimustân rähističčim
 já riäváráin uážuččáim kejâdid pase muáduidâd
 almeest nuvâhännáá.

6. Rähis almalâš Eeči.

Tun uáináh muu já ubâ elimân.

Lam hiäju já vaibâm.

Muu eellim lii lamasá vájugâs.

Lam porgâm puástuvaljiimijd,

vájáldâttâm manġii rákkásumos ulmuid

já tovâttâm pohčâs olssân já iärrásáid.

Puádám ovdâsâd tagarin ko lam.

Jeesus rähisvuodâ tiet luátám toos,

et tun vááldáh muu vuástá.

Immeel, mušte muu lädisvuodâstâd.

Sudopestim

1.

P Hiärrám Jeesus Kristus lii ettâm máttááttâspárnáidis:

”Kiäs tij addelvetted suddoid addâgâs,
sunġin toh láá addâgâsadelum.”

Taan pákkum miel Jeesus Kristus palvâleijen kulluuttâm,
et tuu sudoh adeluvvojeh tunġin addâgâs
Eeġi já + Alge já Pase Jiegâ noomân.

2.

P Jeesus iätá:

”Ustevâm, oro torvolaš mieláin,
tuu sudoh láá adelum addâgâs.”

[Suu palvâleijen ciälhám tunġin taan sudopestim
Eeġi já (+) Alge já Pase Jiegâ noomân.]

3.

P ”Hiärrá lii alda taid, kiäin lii cuovkkânâm váimu,
sun piälušt taid, kiäin lii morrum mielâ.”

Jeesus Kristus palvâleijen nanodâm tunjin,
et Immeel addel ármustis puoh tuu suddoid addâgâs.

4.

P Puohvâldâlâš Immeel adelus mijjân sudoidân addâgâs
já läidejus mii avalâš elimân.

S Aamen.

5. Rukkoos

Rukkoosavžuuttâs maņa puáhtá lede uánihis, joskis rukkoos.

O Ruhâdâllup.

1. Puohvâldâlâš Immeel, ráhis almalâš Eeči. Tun tuubdah hiäjuvuodâidân. Tuše tun puávtáh piäluštid mii. Nanosmit iäláskittee Jiegâinâd NN, nuuvt et sun luátáččij tunjin meiddei ataštâsâst. Kijtto tast, et uázžup pääccid tuu kiedáid torvolâš mieláin. Kuulâ mii Algaad Jeesus Kristus noomâst.
2. Pestem Jeesus Kristus. Kijtto addâgâsaddelmistâd. Adde NN:n vyeimi jyehi peeivi turvâstid ármusâd já pyerivuotâsâd. Iššeed suu jotteed tuu kiäinu sánâsâd já lopádâsâidâd lyettimáin. Oro suu caggen vädisvuodâin já killáamušâi ääigi. Čuovâ suu Pase Jiegâinâd. Kiddii suu ain nanosubbooht olssâd. Taam mij áánnup áármud já lädisvuodâd tiet.
3. Hiärrám Jeesus Kristus, tun Immeel Alge. Kijtto tast, et jodáh paldâstân já lah muu caggen hiäjuvuodâstân. Oro torvonân já varjâl muu.

S Aamen.

II Sääni

6. Ráámmátluuhâm

Lohhoo ohtâ teikâ mottoom čuávuvâš ráámmátteevstâin.

Puáhtá kevttiđ meiddei ráámmátteevstâid kirkkoive äigipuudâ miel
teikâ eres ráámmátteevstâid.

Ps. 73: 23–26

Mun uážum ain orrood tuu kuvlân,
tun tolliik kiedâstân
Tun jodettah muu táátud miel,
já loopâst tun pajedah muu kunnei.
Almeest must lah tun,
tun lah áinoo torvon eennâm alne.
Veik rummâšân já siällun silo,
Immeel lii källen, muu uási avalávt.

Jes. 43: 1–3

Näävt iätä Hiärrá, kote tuu sivnedij:
- Ele poolâ. Mun lam lonestâm tuu.
Mun lam tuu noomâ miel koččom,
tun lah muu.
Ko jodáh čaasij čoodâ, mun lam tuin,
ko viirdij rasta, toh iä tuálvu tuu fárustis,
ko lavkkiih tuulâ čoodâ, tun jiehk pyele
ige tullânjuovčâ tuu puáldi.
Mun, Hiärrá, lam Imelâd.
Mun, Israel Pase, lam tuu piälušteijee.

Hepr. 4: 14–16

Tastko mist lii stuorrâ ollâpappâ, kote lii jottáám olmij
čoodâ, Jeesus, Immeel Alge, pissoop taan tubdâs-
tâsâst. Mii ollâpappâhân jis kii puáhtá iberdiđ vááijuv-

vuodâidân, tastko suu láá keččâlâddâm siämmáánáál ko mij-uv šoddâp keččâlâddâm vuálá; sun tuše ij juurâm suudon. Lävkkejop tondiet ruokkâdávť áármu väl-dičokkámsaje oovdân, nuuvť et uážuččijm áármu já lädisvuodâ, kavnáččijm iše talle ko tom tarbâšep.

Matt. 11: 27–30

Jeesus iätá:

”Puoh lii Iäččám adelâm muu haaldun. Alge ij tuubdâ kihheen eres ko Eeči ige Eeji kihheen eres ko Alge já tot, kiäs Alge táttu suu almottid. Puáttid muu kuuvl, puoh tij, kiäh lepped porgâmist já noodijn sillum. Mun adelâm tijjân vuoinâstâs. Väldid muu kuáddámuš ärdeidâd oolâ já keččâd muu: mun lam váimustân läädis já vyeligâš. Näävt tii siälu kávná vuoinâstâs. Muu kuáddámuš lii pyeri kyeddid, já muu kyermi lii keppis.”

7. Saahâ

8. Oskotubdâstâs

Oskotubdâstâs ciälkkoo oovťâ jienân.

S Mun oskom Imelân,
 Iäčán, Puohvâldâlâžân,
 alme já eennâm sivnedejei,

 já Jeesusân Kristusân,
 Immeel áinoo Aalgan, mii Hiärán,
 kote šohânij Pase Jiegâst,
 šoodâi nieidâ Máárjást,
 kierdâi Pontius Pilatus ääigi,

riistânnävlejui, jaamij já hävdiidui,
lavkkij vuálus tuonâ vâldikoodán,
pajanij kuálmád peeivi jâmmei kooskâst,
lavkkij pajas olmijd,
čokkáá Immeel, Eeji, Puohváldálie uálgispeln
já kalga tobbeen puáttid tuommid elleid já jâmmeid,
já Pase Jiegân,
pase, ohtsii servikode,
poosij ohtâvuodâ,
sudoi addâgâsadelem,
rummâš pajaspanem
já nuvâhannáá cellim.

9. Ohtâsâš ovdârukkoos

Rukkoos puáhtá rähtid meiddei rijjâht.

1. Ellee, puohváldálâš Immeel, tuu mij čuárvup
iššeen. Kuulâ mii ármustâd.

Mij ruhâdâllâp kirhood peelest päikkikuávlustân
já jyehi saajeest.

Mij ruhâdâllâp mii aalmug já ubâ maailm peelest.
Mij kijttep tuu perrust já puoh mii aldemuin. Tun,
kote tuubdah mii iloid já huolâid, sivned mii.

Mušte puoh pyecceid. Mušte meiddei taid, kiäh
killájuh ohtuuvuodâst já torvottesvuodâst. Ruhâ-
dâllâp toi peelest, kiäid teddih ruttâvânuvuotâ teikâ
cellim ulmettesvuotâ, luisis pargonuádh teikâ par-
gottesvuodâ nuádi. Mušte taid, kiäh láá alda
jäämmim.

Mij kyeddip jieččân, kyeimi kuáimán já ubâ elimân tuu haaldun.

2. Puohváldálâš Eeči. Kyeddip ovdâsâd joskis rukosist jieččân, kyeimi kuáimán já ohtsâš ašijdân:

–Ruhâdâllâp kirkkon já servikoddán peeleeest.

(joskâdvuotâ)

– Ruhâdâllâp enâmân já almugân peeleeest.

(joskâdvuotâ)

– Ruhâdâllâp jieččân perruu já aldemui peeleeest.

(joskâdvuotâ)

– Ruhâdâllâp pyeccei, killájeijee já jämmee aldemuidân peeleeest.

(joskâdvuotâ)

Puohváldálâš Eeči. Kijtto tast, et kuulah ánumân. Alestâs liävus tunjin tääl já nuvâhännáá.

S Aamen.

III Ehidâs

10. Uhresalmâ

Saalmâ ääigi läjduvoo ehidâspevdi. Uhresalmâ puáhtá lede ovdâmerkkân salmâ 41, 42 teikâ 50. Saalmâ saajeest puáhtá lede joskis smietâdem.

11. Ehidâsrukkoos

Rukkoos já asâttâssäänih

Rukkoos puáhtá älgid avžuumáin: Kijttup Hiärá, mii Immeel.

L Pase Immeel, tun rähistah puoh ulmuid.

Tondiet vuolgâttih Jeesus mii kuuvi.

Sun pyeredij pyecceid, uusâi lappum ulmuid já oonij
 juáhháast huolâ,
 kii poodij suu kuuvl.
 Sun rähistij mii loopâ räi já adelij elimis mii peeleast.

*Mii Hiärrá Jeesus Kristus, ton iijâ, kuás sun kävildui,
 vaaldij leeibi, sivnedij (+), toijâlij
 já adelij tom máttááttâspárnáidis já eedâi:
 Väldid já puurrâđ, taat lii muu ruumâš,
 kote adeluvvoo tii oovdâst.
 Porgâđ tom muu mušton.*

*Siämmáánáál sun vaaldij kaalhâ, kiihtij (+) já eedâi:
 Väldid já juuhâđ täst, tij puohah.
 Taat kalkkâ lii uđđâ litto muu voorâst,
 kote kulgâttuvvoo tii oovdâst
 sudoi addâgâsadelem tiet.
 Nuuvt távjá ko tast juhâvetted,
 porgâđ tom muu mušton.*

Rähis almalâš Eeči.
 Mij ilodep tast,
 maid Algaad lii porgâm mijjân mii piäluštem tiet.
 Mij kijttep tuu tast,
 et kuáhtáp Jeesus Kristus taan mállásist.
 Sivned mii Pase Jiegâinâd.
 Suovâ mii puohâid ohtii alestid tuu
 almalâš vâldikodestâd.

Suu peht, suin já sust
 kulá tunjin, puohváldálâš Eeči,
 Pase Jiegâ ohtâvuodâst
 kunnee já kirkesvuotâ ain já nuvâhännáá.

S Aamen.

12. Mii Eeči

Hiärá rukkoos ciälkkoo oovtâ jienân.

S Mii Eeči, kote lah oolmijn.

Pasottum liävus tuu nommâ.

Puáduš tuu vâldikodde.

Šados tuu táttu meid eennâm alne nuuvtko almeest.

Adde mijjân onnáá peeivi mii jyehipiäiválii leeibi.

Já adde mijjân mii suddoid addâgâs,

nuuvtko mij-uv addâgâs adelep toid,

kiäh láá mii vuástá rikkom.

Já ele joođeet mii kivsádâsân,

mut peesti mii paast.

Tastko tust lii vâldikodde já vyeimi já kunnee nuvâhännáá.

Aamen.

13. Hiärá ráávhu

Hiärá ráávhu puáhtá lávlud teikâ celkkiđ.

L Hiärá ráávhu liävus tiigijn.

S Nuuvt še liävus sun tuu-uv jieggáin.

14. Immeel Lääbis

S Imelan Lääbis tun, kote kuádáh maailm puoh

suddoid,

äärmit tääl mii-uv.

Imelan Lääbis tun, kote kuádáh maailm puoh
suddoid,
äärmit tääl mii-uv.
Imelan Lääbis tun, kote kuádáh maailm puoh
suddoid,
adde mijjân ráávhu.

15. Ehidâs viettim

Leeibi jyevidijn iättoo:

[Mii Hiärá Jeesus] Kristus rumâš, tuu oovdâst adelum.

Kaalhâ jyevidijn iättoo:

[Mii Hiärá Jeesus] Kristus vorrâ, tuu oovdâst kulgâttum.

Loppäsäänih

L Mij lep váldám vuástá Hiärá Jeesus Kristus.
Sun varjâlus mii avalâš elimân.

S Amen.

TEIKÂ

L Mii Hiärá Jeesus Kristus rumâš já vorrâ
čïävus puoh mii jiegâ, siälu já rummâš [, puoh háámán,]
avalâš elimân.

S Amen.

16. Kijttosrukkoos

L Ruhâdâllup.

1. Aaleest Hiärá, muu siälu,
já puoh, mii must lii,
aaleest suu pase noomâ.

Aaleest Hiärá, muu siälu,
 ele vájaldât, maid puorijd sun lii tunjin porgâm.

Sun addel addâgâs puoh sudoidân
 já pyereed puoh puácuvuodâidân.

Sun luáštá muu jäämmim čáárvást
 já kruvnaá muu ármoin já rähisvuodáin.

Imelâm já Iäččám.

Mij kijttep tuu,

et lah pase ehidâssáin piemmâm mii.

Nanosmit mist osko, tuáivu já kierdâvâšvuodâ.

Kijtto, et uázžup hiäijun orrood tuu alda.

Iššeed mii cuápcud elimist já jämimist tuu uámmín.

Kuulâ mii Algaad Jeesus Kristus peht.

2. Almalâš Eeči, mij kijttep tuu ehidâs läähjist,
 moin nanosmitáh oskoon tunjin.

Labde mii rähisvuodâst kyeimi kuáimásân
 já siäilut mist avalii eellim tuáivu.

Kuulâ rukosân Algaad Jeesus Kristus tiet.

S Aamen.

IV Lopâttâs

17. Sivnádâs

P Sivnedus tii puohváldálâš já ármulâš Immeel,
 Eeči já + Alge já Pase Jieggâ.

S Aamen.

TEIKÂ

- P** Hiärrá sivnedus tii já varjâlus tii.
Hiärrá čuovvâdus muáđuidis tijjân
já liävus tijjân ármulâš.
Hiärrá jurgâlus muáđuidis tii piälán
já adelus tijjân ráávhu.
Eeji já + Alge já Pase Jiegâ noomân.
- S** Aamen.

18. Loppâmuusik

Loppâmuusik puáhtá leđe ovdâmerkkân salmâ 56, 59, 60 teikâ 61.